

## VICEPRESIDENCIA SEGUNDA E CONSELLERÍA DE ECONOMÍA, EMPRESA E INNOVACIÓN XEFATURA TERRITORIAL DE OURENSE.

Rúa Curros Enríquez, 1-4º. 32003 Ourense

**Asunto:** Alegacións ao Acordo do 24 de marzo de 2022, da Xefatura Territorial de Ourense, polo que se somete a información pública a solicitude de autorización administrativa previa, a declaración de utilidade pública, en concreto, coa necesidade de urxente ocupación, a autorización administrativa de construción, o proxecto de interese autonómico e o estudo de impacto ambiental do parque eólico Lamas de Feás, situado nos concellos de Baltar, Os Blancos e Calvos de Randín, na provincia de Ourense (**expediente IN661A 2011/05-3 AT**), DOG Núm. 74, de 19 de abril de 2022.

Don/Dona \_\_\_\_\_

con DNI. Número \_\_\_\_\_,

con domicilio a efectos de notificacións en \_\_\_\_\_ ,  
municipio de \_\_\_\_\_, provincia \_\_\_\_\_, teléfono \_\_\_\_\_.

### EXPÓN:

En relación á documentación presentada a avaliación pública, as seguintes consideracións:

**1ª. FRAGMENTACIÓN DO PROXECTO INDUSTRIAL EÓLICO EN VARIOS PROXECTOS INDEPENDENTES. DIVISIÓN ARTIFICIOSA E FRAUDE DE LEI.** A promotora informa que o PE Lamas de Feás conta con permiso para acceder á rede de transporte de electricidade a través dunha liña que o conecte co PE Fonte Santa (Bande) e outra que continuará con outra até a subestación da Frieira. Hai un PE, Lamas II, en proxecto, situado ao sur do PE Lamas de Feás, que compartirá a liña de evacuación que unirá a subestación de Lamas de Feás coa da Fonte Santa, e despois coa do PE Monte da Neve. Nin ese PE Lamas II nin a liña de evacuación se contemplan neste expediente, polo que se exclúe da información pública o estudo de impacto ambiental da totalidade do proxecto industrial co que se está a privar á cidadanía afectada e ao público da súa consulta e avaliación dos impactos ambientais vulnerándose a Lei 21/2013, de 9 de decembro de avaliación ambiental e a Lei 24/2013, do 26 de decembro, do Sector Eléctrico.

**2ª. NON SE AVALÍAN OS EFECTOS SINÉRXCOS SOBRE O MEDIO E A PAISAXE DA CONTINUIDADE DE POLÍGONOS EÓLICOS NA ZONA.** Nesta área están en trámite o PE Lamas II (Calvos de Randín), o PE Serra de Gomariz (Baltar-Os Blancos), o PE San Martiño (Baltar), o PE Mistral (Baltar), o PE Tramontana (Baltar). E, ao norte, o PE Fonte Santa (Bande-Verea), o PE Monte da Neve (Verea-Celanova) Ademais, xa están operativos os PE O Vieiro (Bande-Verea) e o PE do Larouco (Baltar-Cualedro), así como o de Cabeço Alto (Montalegre), lindeiro do Parque Natural do Xurés. Tamén están en trámite a LAT do Xurés e a LAT do Salas. Aínda partindo da realidade de que se está a implantación do conxunto de parques antes referidos na zona xeográfica de referencia, o estudo dos impactos acumulativos e sinérxicos incorporado como Anexo VI ao EIA non se pode considerar que xustifique as conclusións ás que chega, nin que considere a totalidade dos aspectos que deben ser considerados.

**3ª. OBSTACULIZACIÓN DA PARTICIPACIÓN REAL.** No EIA, desde a páxina 47 á 117 o texto está en inglés, incluído o que parece ser a descrición do ruído xerado polo modelo do aeroxerador. O Anexo XIII tamén está en inglés. A empresa está a vulnerar o dereito de información e participación pública. A Valedora do Pbo, no caso do PE Monte da Neve, vén de solicitar á Xunta que se facilite a tradución de textos en lingua non oficial. **En canto ao prazo de alegacións.** Nun informe de decembro de 2021, o Consello da Cultura Galega advirte: “a participación social nos procedementos de tramitación dos proxectos se ve moi limitada”. A exposición pública dunha documentación técnica voluminosa e nun prazo curto (apenas un mes) **IMPIDE A PARTICIPACIÓN REAL** e xera **INDEFENSIÓN** entre a veciñanza. Vulnérase a Directiva 2003/4/CE do Parlamento Europeo e do Consello, do 28 de xaneiro de 2003, relativa ao acceso do público á información ambiental e o Convenio de Aarhus de 1998 sobre o acceso á información, a participación do público e o acceso á xustiza en materia de medio ambiente. Vulnérase a Decisión 2005/370/CE do Consello, do 17 de febreiro de 2005 sobre a celebración, en nome da Comunidade Europea, do Convenio sobre o acceso á información, a participación do público na toma de decisións e o acceso á xustiza en materia de medio ambiente (DO L 124 de 17.5.2005, pp. 1-3) . Vulnérase o Regulamento (CE) n.º. 1367/2006 do Parlamento Europeo e do Consello, do 6 de setembro de 2006, relativo á aplicación, ás institucións e aos organismos comunitarios, das disposicións do Convenio de Aarhus sobre o acceso á información, a participación do público na toma de decisións e o acceso á xustiza en materia de medio ambiente (DO L 264 de 25.9.2006).

**4ª. FALLA DE UTILIDADE PÚBLICA E INTERÉS SOCIAL DO PARQUE EÓLICO LAMAS DE FEÁS.** Calquera utilidade pública ou interese social ou autonómico deste proxecto carece de xustificación algunha, xa que non pode amparar proxectos industriais que se desenvolvan ao abeiro dunha planificación sectorial eólica que vulnera de forma flagrante a Lei 21/2013, de 9 de decembro de avaliación ambiental. Ademais a mercantil promotora non xustifica o interese autonómico do proxecto eólico, que non deixa de ser outro proxecto eólico máis, dos moitos que se están a tramitar arestora por parte da Xunta de Galiza. Estaríamos ante un caso de fraude de lei e desviación de poder que non deba ser amparada pola Dirección Xeral de Planificación Enerxética e Recursos Naturais, órgano substantivo.

**5ª. DISTANCIAS INSUFICIENTES ÁS CASAS E ALDEAS.** Nun rango de menos de 3 quilómetros do enclave das máquinas aeroxeradoras están situadas as aldeas de Serois, Lobás, Feás, Lomear, Pintás e O Silvoso (Calvos de Randín), Fontearcada e Covas (Os Blancos), Meaus e Tosende (Baltar). Os niveis de rúidos que a empresa estima no seu informe non son asumíbeis dada unha recente sentenza en Francia que determinou impactos severos na saúde das persoas polo efecto do denominado síndrome

da turbina, nun caso referido a un polígono empresarial con máquinas de menor tamaño que as que aquí se contemplan e a unha distancia de 1,5 quilómetros. .

**6ª. INVASIÓN e DEPRECIACIÓN DA RESERVA DA BIOSFERA.** Todo o Concello de Calvos pertence a Reserva da Biosfera Gerês-Xurés. O proxecto sitúa unha parte das súas infraestruturas en zona Reserva da Biosfera, e intenta minusvalorar a cualificación deste territorio establecendo graos dentro da propia Reserva. Un exemplo de depreciación dos valores naturais e paisaxísticos refírese ao pico da Aguioncha, do que a Memoria do EIA di: “a pesar de haber sido analizado como posible Lugar de Interés Geolóxico en el documento *Inventario de Lugares de Interese Xeolóxico da Reserva da Biosfera Transfronteiriza Gerês-Xurés*, no fue finalmente seleccionado debido a sus bajos valores turístico-recreativos, didácticos y científicos”.

**7ª. AFECCIÓN SEVERA E PREXUIZOS IRREVERSIBLES PARA AS ÁREAS DE INTERÉS PAISAXÍSTICO (AEIP):** AEIP Penedos da Raíña Loba, AEIP Río Airoa, AEIP Cadoiro da Firveda, AEIP Touzas da Saínza, AEIP Fraga da Rousia, AEIP Serra da Pena-O Couto Mixto, AEIP Veigas de Golpellás, AEIP Serra do Xurés, AEIP Penas da Serra do Larouco, Miradoiro de Santa Eufemia, PR-G 28 Rota de Padendro.

**8ª. AFECCIÓN MOI SEVERA E PREXUIZOS IRREPARABLES PARA A REDE NATURA 2000 E A SÚA COHERENCIA.** Falla de conectividade ecolóxica entre os ecosistemas. Cómpre ter en conta que as especies non entenden de límites xeográficos e que o mantemento da conectividade ecolóxica é fundamental para o mantemento dos ecosistemas e da coherencia da propia Rede. Afección significativa e danos irreversibles a outros espazos protexidos

**9ª. Afección moi severa e prexuízos significativos para os recursos hídricos.** Vulneración flagrante da Directiva Marco da Auga (DMA). **AUSENCIA DUN ESTUDO HIDROLÓXICO E HIDROXEOLÓXICO QUE GARANTA A CALIDADE DAS MASAS DE AUGA SUPERFICIAIS E SOTERRADAS E A NON AFECCIÓN AOS ACUÍFEROS.** Entre os cursos fluviais que nacen na serra, e nun rango de menos de 600 metros de distancia dos enclaves dos aeroxeradores e a subestación e outras infraestruturas onde se realizarán obras, están o Regato de Cachasegunda, o Río de Lobás, o Regato de Forzaos, o Regato do Mosterior, o Regato de Fontearcada, o Regato Porta da Veiga e un afluente innominado do Regato de Porta da Veiga. O proxecto tamén afecta severamente ao sistema de brañas e humidais da área, así como a LAT de evacuación, que decorrerá por zona Reserva da Biosfera e nos lindes das ZEC Veiga de Ponteliñares e a ZEPA Baixa Limia-Xurés.

**10ª. VULNERACIÓN FLAGRANTE DA LEI 7/2012, DE 28 DE XUÑO DE MONTES DE GALICIA. ELIMINACIÓN DA MULTIFUNCIONALIDADE DO MONTE.**

**11ª. AFECCIÓN SEVERA E PREXUIZOS SERIOS E IRREPARABLES PARA AS EXPLOTACIÓNS AGRO-GANDEIRAS E APÍCOLAS DA ÁREA DE AFECCIÓN DO PROXECTO:** A estación eólica e as súas infraestruturas de evacuación fragmentan as explotacións agrogandeiras e apícolas coa conseguinte perda da base territorial destas e a perda de rendementos. A fragmentación que produce a infraestrutura eólica resulta incompatible cos obxectivos da Política agraria comunitaria (PAC).

**12ª. AFECCIÓNS GRAVES Á FAUNA.** O proxecto ten afeccións severas sobre determinadas especies vulnerábeis, en particular, aves rapaces como a Águia real, así como sobre quirópteros (morcegos) e anfibios, que non contan cun plan de conservación de especies ameazadas.

**13ª. AFECCIÓN SEVERA AO PATRIMONIO CULTURAL E ARQUEOLÓXICO E A SÚA DESCONTEXTUALIZACIÓN, o que habería que acumular o impacto xerado pola LAT de evacuación do parque eólico.**

En virtude do anterior, **SOLICITA:**

O rexeitamento das solicitudes de autorización administrativa previa, da declaración de utilidade pública, en concreto, coa necesidade de urxente ocupación que non se xustifica, da autorización administrativa de construción, do proxecto de interese autonómico e do estudo de impacto ambiental do parque eólico Lamas de Feás, situado nos concellos de Baltar, Os Blancos e Calvos de Randín, na provincia de Ourense (expediente IN661A 2011/05-3 AT), DOG Núm. 74, de 19 de abril de 2022 e a súa retirada definitiva pola súa incompatibilidade cos valores ambientais e paisaxísticos presentes na área de afección do proxecto e a falla de licenza social.

**OUTROSÍ DIGO:** Que é preciso resposta razoada a estas alegacións segundo á Ley 39/2015, de 1 de outubro, do Procedemento Administrativo Común. A falta de resposta é motivo de nulidade da tramitación.

Fdo.-

En \_\_\_\_\_, a \_\_\_\_\_ de MAIO de 2022.